

صاحبي وحبيبتي

من زمان عايش لوحدي من زمان
والأمان كان هو صاحبي في المكان

ماشى دوغري م البيت لشغلي
طول عمري ما أعرفش اللوع

ماكنتش أعرف ان اللي زيي
م السهل ممكن ينخدع

كل اللي حيلتي
صاحبي وحبيبتي
كانوا هما الإثنين دنييتي

سبب سعادتني وفرحتني
وكانوا ونسي في وحدتي

حببت أسافر جريت عليهم
هما اللي ليا وأنا روعي فيهم

وصيته ياخذ باله م البنية
قالني ح أشيلها ف رموش عينا

ومد إيده
وقام عاهدني
روحت واخده
بشوق ف حضني

جوابين تلاتة و بالكثير
وما عادشي حد يسأل عليا

وعشان أقصر مدتي
كل يوم باكتب جواب
مرة حب
ومرة شوق

ومرة كام
كلمة عتاب

جبت أجمل شبكة
عيني جات عليها
كنت باتخيلها لابساها ف إيديها
شوفت فستان الفرحة مرسوم عليها

رحت راجع م السفر علي بيت صديقي
عمال أفكر ف الفرحة وانا ف طريقي

وح أقول له إيه ويقول لي إيه
وح أقول لها
وح أخذوا ونروح عندها ف بيت أهلها

وفضلت أخبط وانا فرحان
لحد ما صحبوا الجيران

وبعد ما الباب اتفتح
لميت شعوري اللي إنجرح

اللي فتحت باب صديقي
كانت حبيبي

اللي كان ف إيديا طار
واللي جوا القلب نار
بالدموع خدت القرار
ورجعت تاني ع المطار
صاحبي وحبيبي